

## Wakita na a puwatertaa Paul ge emnde a **FILIPÍ**

### *Ga Use á Paul*

<sup>1</sup> Wakita na yá anƙwa puwaná ba iya Paul, ñá antara Timaute, ña emnde a slera á Yaisu \*Almasiihu. Ná puwakurte ge kure emnde a dǎba Dadaamiya am Filipi, ge kure bademme á emnde na kwá átuge Yaisu Almasiihu na. Ná puwakurte ge kure male-aha á emnde á Dadaamiya, antara emnde na tá an slera-aha am aiklasiya bademme. <sup>2</sup> Eddemiya Dadaamiya antara Yaakadada á miya Yaisu Almasiihu a marakuránmaga ñgurna, á varakurteva hairire.

### *Maduwa á Paul ge emnde a Filipi*

<sup>3</sup> Ba kelaa má dzamanakurtedzámá, yá slafaná ba we-aaruwa ge Dadaamiya. <sup>4</sup> Ba kelaa má yá anƙwa maga maduwa arge kure, yá ñalakuru Dadaamiya an higa am ervaunƙe. <sup>5</sup> Yá slafaná we-aaruwa jipu ge Dadaamiya adaba kure. Adaba kwáye ba vacite na gakurevge emnde á fetarfe na, sem kina, kwa ba palle antara ya am slera á bálá labara á higa, elva a Yaisu \*Almasiihu. <sup>6</sup> Diyandiya ba jirire geni Dadaamiya na a fantau ge mága slera jirire am ervaunƙe á kure na wá, á de yanka am dagave, sey á de zlnaazle, á yanka dƙideki dem sarte á sawa Yaisu Almasiihu. <sup>7</sup> Shagera

jipu yá anƙwa á dzámá una ɲanna am er-  
 vaunƙe-aaruwa arge kure. Wayanakurwáyá an  
 ervaunƙe-aaruwa palle. Adaba kure antara iya  
 wá, baɗemme á miya Dadaamiya a gamiyaare  
 barka. Adaba una ɲanna melawiyumele.  
 Ma kina yá am dangay na, ma am sarte  
 na watse yá de katafke á shairiya na keni,  
 melawiyumele geni yá palanaapálá labara á higa  
 elva a Yaisu Almasiihu. Melawiyumele geni yá  
 marateránmárá jirire ge emnde. <sup>8</sup> Dadaamiya  
 diyaadiya baɗemme geni wayanakurwáyá an  
 ervaunƙe-aaruwa palle. Yaisu Almasiihu na am  
 iya na á wayakúrá ba ɲane.

<sup>9</sup> Dalila á una ni yá anƙwa ɲalakuru  
 Dadaamiya na wá, yá kátá kwá wayaavewaye  
 am dagave á kure ma vaatara keni, lauktu kwá  
 de diyeddiye jirire á Dadaamiya ba shagera,  
 kwá de diyeddiye shagerire antara shagerkire  
 baɗemme. <sup>10</sup> Daaci, kwá de dzegwándzegwa  
 lanaale názena gevge shagerire antara  
 shagerkire, kwá de geva estuwa emnde na  
 dzayye ervaunƙe-aatare, dem vaciya á sawa á  
 Yaisu \*Almasiihu keni á de jerka shagerkire am  
 kure ɗekidɗeki. <sup>11</sup> An ndzedá á Yaisu Almasiihu  
 watse kwá de maga ba duksa shagera baɗemme.  
 Daaci estuwa, baɗemme á emnde na tá de zhára  
 una ɲanna, tá de fa zherwe á ba áte Dadaamiya,  
 tá de gálá zhera-aara.

*Sey ba Yaisu \*Almasiihu palle una slefa shifa  
 am ura*

<sup>12</sup> Egdzar mama-aha-aaruwa, yá kátá kwá  
 diyeddiye geni masiba-aha na á shá ya na wá,  
 á piyeka labare á higa ge de katafke, amá á dáná

á ba de katafke. <sup>13</sup> Adaba una ñanna, bademme á sawji-aha na tá ufa há á male á lárde, antara emnde umele kwakya, diyardiya ganakini yá am danɗay kina adaba zhera á Yaisu \*Almasiihu. <sup>14</sup> Zlabe adaliye: Yá am danɗay tsa, aley anɗwa á vaterte ndzedá ge emnde a fetarfe kwakya áte unɗule á Yaakadada Yaisu Almasiihu, jauje ge una werre. Sharánshá ndzedá jipu ge bálá elva á Dadaamiya á de katafke, baaka lyawa-aatare.

<sup>15</sup> Amá tá anɗwa emnde umele-aatare wá, tá bálá waazu á elva á Yaisu Almasiihu, tá ámbere shelha áte iya. Amá emnde umele wá, tá bálá ba elva á Dadaamiya an shagerire á ervaunɗe.

<sup>16</sup> Itare na tá maganá an shagerire á ervaunɗe na wá, adaba wayarwáyá an Yaisu Almasiihu. Diyardiya geni a siyaa ba Dadaamiya ásehuna, geni yá se palaternaapala elva-aara ge emnde, geni una ñanna jirire. <sup>17</sup> Emnde umele na tá shelha áte iya na maa, tá maga waazu á elva á Yaisu Almasiihu tsa, mele tá kátá gev male arge iya zlabe. Amá ervaunɗe-aatare shagereka, tá kátá fiyaare ba ge zladá zlabe adaliye am danɗay. <sup>18</sup> Mbate, ma tá maganá an danɗwire á ervaunɗe waazu ñanna, ma tá maganá á ba an shagerire á ervaunɗe-aatare keni, tá bálá ba elva á Yaisu Almasiihu, daaci á vite ba higa ge iya. Yá ndaakur ba jirire, ma vaatara keni yá á ba an higa-aaruwa ya. <sup>19</sup> Adaba diyandiya geni bademme á una ñanna ba barama ge ñezliñezla. Una ñanna keni adaba ba maduwa á kure antara Shedfekwe á Yaisu Almasiihu, bademme á meliyuwa ba una ñanna.

<sup>20</sup> Názena yá kataná ya an ervaunɗe-aaruwa

kwakya wá, ma andze á wika zherwe, ma yá gazleka ba cekwaan̄gudí keni tsete am vatená dem ba ge dekideki, ma yá an shifa, ma yá an emtsa keni. Adaba an názena yá an̄kwa maganá ya na wá, yá kátá ba maratera yaikkire á Yaisu \*Almasiihu ge emnde, geni a galargálá ba n̄ane palle. <sup>21</sup> Iya wá, ma yá an shifa keni, shifa-aaruwa ba Yaisu Almasiihu palle. Sakwa má emtsanemtsa, una vayvaya zlaɓe ádaliye. <sup>22</sup> Amá am sarte na zlaɓe yá an shifa wá, yá naba melaterumele ge emnde. Daaci diyanka názena yá eksesa ya, ma njá an shifa, ma emtsa keni. <sup>23</sup> Am duksa-aha n̄anna buwa na wá, ire-aaruwa gevge bu-buwa, amá yá kátá ba emtsa, geni njá de njá antara Yaisu Almasiihu, ya hayaa ba una n̄anna arge njá an shifa. <sup>24</sup> Amá nja-aaruwa an shifa keni wá, an̄kwa nampire-aara ge kure. <sup>25</sup> Estuwa, diyandiya ba jirire geni zlaɓe yá njá an shifa. Mí nja kerde an shifa, geni kwá farfe ge ndzedá á kure áte un̄nule á Dadaamiya, antara kwá farfe ge higa á kure am fetarfire. <sup>26</sup> Daaci, vacite na má sanesse am dangay danemda zlaɓe ádaliye á dem dagave á kure wá, kwá de gálá Yaisu Almasiihu adaba una n̄anna.

<sup>27</sup> Duksa palle wá, zlalava á kure a gevka gergere antara una kwa cenanaa am labare á higa, elva a Yaisu \*Almasiihu na. Yá kátá ba cena geni kwá an ndzedá áte un̄nule á Dadaamiya, we á kure palle, kwá wava an ervaunde á kure palle geni kwá da labare á Yaisu á de katafke, ma yá an̄kwa am dagave á kure, ma ya baaka keni. <sup>28</sup> A wakurka lyawa átuge kelaade-aha á kure mazla-

aara. Estuwa, ba itare an ire-aatare keni tá de diyeddiye geni tá an kefa ba itare, amá kure wá, an lya shifa á kure ba jirire. Una nanna keni á de maraterná ba Dadaamiya. <sup>29</sup> Ge kure wá, Dadaamiya a magakuraa ngurna geni kure keni kwá fetarfe áte nane adaba Yaisu Almasiihu. Una nanneka palle, amá a magakuraa ngurna geni kwá shushe zladá adaba nane. <sup>30</sup> Á ba am nja-aaruwa keni, kure nakuranna wava-aaruwa. Ba kina keni kwá cená ba nane geni yá á ba am wáva nanna. Kina wá, kure keni dakuremda am wáva nanna ba seke iya.

## 2

### *Yaisu a shanaa estuwa yaikkire áza Dadaamiya*

<sup>1</sup> Am gakurevge palle antara Yaisu \*Almasiihu na, a ndzedakurtaa ba una nanneka emtu? Wáyáva-aara áte kure na ankwá á vakurteva emtu ndzedá? Ankwá emtu Shedekwe á Dadaamiya á maga slera-aara am kure? Kwá ankwá wayaavewáye emtu kure keni? Ankwá emtu zezarizire am dagave á kure? <sup>2</sup> Máki estuwa wá, wayawaavewaye am dagave á kure ma vaatara keni. Enkale á kure á gevge palle, we á kure keni á gevge palle. Má magakurnaa-maga una nanna wá, iya keni á de higetehiga ervaunđe-aaruwa kwakya. <sup>3</sup> Zharauka sey ba ire á kure, galauka ire, amá arge una nanna wá, gawanaaga ire á kure, zharauzhára emnde umele ba seke ta male-aha arge kure. <sup>4</sup> Ma ware keni a emmága názena ni á de melateru ge

emnde umele, zharauka sey ba ire á kure palle ge maga názena á de melakuru ba ge kure palle na. <sup>5</sup> Eksawanteksa enjkale á Yaisu Almasiihu á dem ire á kure.

<sup>6</sup> Njane wá, ba jirire geni njane antara Dadaamiya tá ba palle, amá njane tatayaaka gev kalkale an Dadaamiya dekideki.

<sup>7</sup> A yaa dzámá una njanna ba dekideki, a ganve ire-aara urimagwe. Á ba am urimagwire njanna keni, a geve sleslera á emnde zlafe ádaliye.

<sup>8</sup> Án una njanna wá, a ganve ire-aara cekwa, a fansaarfe ge Dadaamiya, haa a danaa á dem emtsa. Emtsa njanna keni, baira ta janaa á ba áte dzangala.

<sup>9</sup> Adaba una njanna, a naba walantehe ge Dadaamiya, a vante yaikkire arge duksa bademme, a fanaa zhera na jauje ge zhera-aha bademme ba seke zawa á slera-aara.

<sup>10</sup> A vante una njanna geni bademme á názena am samaya antara názena áte haha antara ba názena am ekte á haha keni, má cenarácena zhera-aara wá, tá se kezlan ugje á katafke-aara.

<sup>11</sup> Zlafe ádaliye ma ware keni á de ndahaná á ba an we-aara geni Yaisu Almasiihu wá, Yaakadada. Estuwa tá de gálá Eddeņara Dadaamiya keni.

### *Gawuvge ba seke parakkire*

<sup>12</sup> Adaba una njanna egdzar mama-aha-aaruwa, kure keni fawansarfe ge Dadaamiya. Am sarte na ndza yá aņkwa ázekure wá, kwa

fansaare ge Dadaamiya. Kina na yá ßaaka ázekure na keni, fawarfe zlaße ádalíye ge fesarfire á kure. Adaba Dadaamiya a lyakursehe, daaci kure keni magawanánmaga slera na ni á de mára geni a lyakursaa ñane. Magaumága una ñanna an lyawa-aara. <sup>13</sup> Adaba Dadaamiya wá, ankwá á maganá ba ñane slera-aara am kure, geni kwá wáyá ba názena á kataná ñane kwá ámbera emmága.

<sup>14</sup> Bademme á názena kwá maganá kure, magauka an ga jawe bi an ervaunđe. <sup>15</sup> Daaci estuwa kure egdzara á Dadaamiya, kwá gev emnde na dzayye ervaunđe á kure, ßaaka laakire am kure ge mága mandzawire. Gawuvge kwa parakkire-aha ba kure am dagave á emnde a mága kemañgerire, <sup>16</sup> kwá baterná ba kure elva á shifa na, an shagerire á ervaunđe. Má magakurnaamaga una ñanna wá, yá de nanna geni zladá á slera na ya maganaa iya na gevka dey.

<sup>17</sup> Ervaunđe á kure na kwa vante ge Yaisu \*Almasiihu na wá, una ñanna gevge ba seke sadake á nasherire á kure na kwa vante ge Dadaamiya. Iya wá, ámbane tá de ja shifa-aaruwa bademme, amá ma jarija keni, ba higa ge iya. Adaba uzhe-aaruwa keni á de gevge sadake na yá fakuraare ge náza á kure na. Má gevge estuwa, yá de higa jipu, yá kátá higa á kure keni a gevge ba seke náza-aaruwa. <sup>18</sup> Estuwa higauhiga bademme á kure, higaumihiga átirpalle.

*Timaute antara Aipafrauditus*

19 Má wayetewayaya Yaakadada Yaisu wá, yá tama bela Timaute ba herzhe na á dezekure, geni watse á se mbediwá ñane labare á kure. Watse yá shá ndzedá átekwa ba seke una á de vakurte ge kure na. 20 Áhuna wá, baaka ura enkale á ñere palle seke ñane, adaba ñane wá, á dzamakurdzámá jipu. 21 Amá emnde umele wá, ma ware keni á magá ba názena watse shagera ba ge ñane na, tá dzameka názá á Yaisu \*Almasiihu dekideki. 22 Amá Timaute wá, ba kure keni diyakurdiya shagerire á zlaláva-aara. Njá ankwa maga waazu á labare á higa á ba antara ñane, á meliyumele jipu am slera ñanna, ba seke egdzere á melanu ge eddenjara am slera. 23 Daaci yá paka ba má icaranvice shairiya-aaruwa, yá de bela ñane á dezekure ba watsewatse. 24 Má wayetewayaya Yaakadada wá, ba iya keni, diyandiya yá ankwa duwa á dezekure ba herzhe na.

25 Egdza emmeruwa Aipafraditus na kwa belanaa kure á sezeruwa an náza ja wedera-aaruwa na wá, magañernaamaga slera kwakya antara ñane. Kina wá, shagera ba yá belanaabela, á eptsa á dezekure zlaɓe ádalije. 26 Adaba ñane keni wesheteweshe ire-aara, wayaawayaya jipu geni á de zharakurzhará, adaba diyaadiya ganakini cenakuráncena lapikere-aara ge ñane. 27 Ba jirire geni ndza lapika ba zlazlada, a juwa ba cekwaangudi ge emtsa. Daaci a zanvaare ba Dadaamiya, a mbanaahe. A zanvaare ge ñane palleka, a zivaare ge iya keni, geni a shananka shunñula umele zlaɓe ádalije. 28 Adaba una ñanna, wayanwayaya jipu



geni yá eptsanaaptsa zlaɓe ádaliye á dezekure, geni má de puwakurtepuwa ice á kure áte ɲane, kwá de higa jipu, iya keni á de ekhya ervaunɗe-aaruwa. <sup>29</sup> Daaci má de damda am dagave á kure, lyauvaalya an higa á kure baɗemme, aɗaba egdza emmekure áte unɲule á Yaakadada, faufa zherwe áte jeba á emnde ɲanna. <sup>30</sup> Aɗaba ɲane a juwaa ba cekwaanɲuɗi ma á emtsa aɗaba slera á Yaakadada. Dzameka shifa-aara ɗekideki, geni á zlanazle slera na ma kwá maginá kure.

### 3

#### *Tá shaná estara dzayyire á ervaunɗe á katafke á Dadaamiya*

<sup>1</sup> Egdzar mama-aha-aaruwa, higauhiga mazla-aara aɗaba kwa emnde á Yaakadada. Elva ɲanna yá ekkudeka ya ɗekideki ge endáhá-aara, yá aɲkwa fakuraarefe zlaɓe ádaliye eppuwa-aara aɗaba ɓaaka shaige-aara kwá de shá ndzedá an ɲane. <sup>2</sup> Faufa hyema áte emnde á ɓala labare á fida, ɲuɲuɗi-aha na tá kátá ba puwa emnde á dem shedekwe na. <sup>3</sup> Dem shedekwe á jirire áza Dadaamiya wá, á ba am miya, itare diyarka. Aɗaba miya wá, mí ɲala Dadaamiya an hakuma á Shedekwe Cudedɗe. Mí gala ba Yaisu \*Almasiihu palle, mí fetarka áte názena mí maganna miya geni mí de shá dzayyire á ervaunɗe áza Dadaamiya. <sup>4</sup> Ma seke naɗe-aha á emnde am duniya na á maga nampire wá, iya keni ma andze yá gálá ire an ɲane. Má bánba edda-aara geni aɲkwa nampire á ɗaba

náde-aha á emnde am duniya na wá, náza-aaruwa ma andze á tsaaka. <sup>5</sup> Adaba iya wá, yá ba egdza á \*Iserayiila miyenne, yá egdza á Bainjamain am jeba á Ibraniŋkau-aha miyenne, ta fiya am sheɗekwe am hare tiisire. Má ge ɗaba \*tawraitá á Yahudiya-aha, baira iya ndza ya ura Farisá. <sup>6</sup> Ndza ŋannaŋa á ba áte kalkalire-aara baɗemme názena am tawraitá á Yahudiya-aha, de ba am zlaɗa keni puwanaterempuwa emnde na tá ɗaba Yaisu Almasiihu na. Má ge ɗaba tawraitá wá, baaka ura á biyá: ɗabaŋka tawraitá. <sup>7</sup> Baɗemme á duksa-aha ŋanna ndza ya zharater ba seke duksa á nampire, amá kina wá, adaba yá aŋkwa ɗaba Yaisu Almasiihu na wá, yá zharater ba seke duksa ba dey mazla-aara. <sup>8</sup> Eptsanaterveptsa iga ba ɗekiɗeki ge duksa-aha ŋanna, adaba diyandiya Yaakadada Yaisu Almasiihu. Una ŋanna jauje ge duksa baɗemme. Eptsanaterveptsa iga ge duksa-aha ŋanna adaba ŋane, yá zharater ba seke ɗugje mazla-aara am ice-aaruwa, geni a jauje ba Yaisu Almasiihu palle am ervaunɗe-aaruwa. <sup>9</sup> Ma yá njá an shifa keni, yá njá á ba an ŋane palle. Ya ndahaka mazla-aara geni yá ura dzayye ervaunɗe áza Dadaamiya adaba yá fansaare ge tawraitá, amá názena á givege sledzayye á ervaunɗe áza Dadaamiya wá, sey ba yá fetaare áte Yaisu Almasiihu. Ba Dadaamiya palle a giyanvege ervaunɗe dzayye, adaba yá fetaare áte ŋane. <sup>10</sup> Názena yá kataná iya kina wá, ba yá diyeddiye Yaisu Almasiihu antara hakuma-aara na a tsete am faya an ŋane na, antara yá shushe

laruwa ba seke una a shanaa ɲane; má yá emtsa keni, yá emtsa ba seke náza-aara, <sup>11</sup> geni má a ewwáyá Dadaamiya wá, á shifiteshifa ba seke una a shifante ɲane na.

*Yá zhagade á ba á de katafke ge báká názena á katafke-aaruwa*

<sup>12</sup> Ndahanka ya geni iya wá, damda duksa ɲanna yá bakaná ya na am erva-aaruwa, ndahanka keni ganevge ura cuƒeƒe, amá yá ámbera á ba wawa geni a demda duksa ɲanna am erva-aaruwa, adaba lyivalya Yaisu \*Almasiihu, ya am erva-aara ge ɲane. <sup>13</sup> Egdzar mama-aha-aaruwa, ndahanka ya geni iya wá, shanánsa duksa ɲanna zlauzle, amá duksa palle yá maganá ya wá, yá eptseka wafke-aaruwa ge zhárá názena ya eptsanve iga, amá yá zhagade á ba á de á katafke geni a shanánsa duksa ɲanna yá bakaná ya na. <sup>14</sup> Yá zhagade á ba á de á katafke, geni a danemda á dem tate ɲanna á kataná ervaunƒe-aaruwa, yá de lyevalya laƒa na á ƒahamiya Dadaamiya ge ɲane na, á ba ɲane: Sawmbare á sem mba-aaruwa am samaya, adaba fakurtarfe áte Yaisu Almasiihu.

<sup>15</sup> Adaba una ɲanna, miya emnde na gyaimiye-bgye am elva á Dadaamiya na wá, shagera eɲkale á miya a gevge palle áte duksa ɲanna. Máki tá aɲkwa emnde na elva ɲanna daaka á dem eɲkale-aatare, watse á de marateránmárá Dadaamiya ba parakke. <sup>16</sup> Duksa yaikke wá, unɲule ɲanna mí ƒabaná miya sem vatená na wá, eptsaumika á dem iga, amá mí zlaláwa á ba á de katafke.

17 Egdzar mama-aha-aaruwa, ekkure bademfire á kure dabaudfaba ba sera-aaruwa, zharauzhára gárava á zlala nanna áte náza á emnde na tá ankwá magán ba kalkale antara náza á nje na. Ekkure keni magauma á ba áte una nanna. 18 Adaba tá ankwá emnde umele kwakya, labare-aatare keni ndza ya bakuránba ser kwakya, kina keni yá bakuránba zlafe adaliye an yawe kyuwa am ice: maga-aatare nanna wá, tá kelaade-aha á emtsa á Yaisu \*Almasihu áte dazngala. 19 Vaci shairiya wá, watse tá dem kára, adaba dabarka Dadaamiya. Dadaamiya-aatare ge itare sey ba huđe, tá maga ba názena zherwe bademme, amá á waterka dekideki, baira tá gala ire an nane, tá dzama ba kazlaja á duniya. 20 Miya wá, watse mí dem mba á Dadaamiya, mí páká ba sawa á Yaakadada Yaisu Almasihu Selyamilya, á sawa am samaya. 21 Am sarte na má de samsa nane an hakuma-aara, á se ganvege duksa bademme am sera-aara, á se eptsamiyantepsta vuwa a laakire á miya na, geni vuwa á miya keni á gevge an dárádza seke náza-aara.

## 4

*Higauhiga, baaka lámbe á kure, kwá am erva á Yaakadada*

1 Adaba una nanna egdzar mama-aha-aaruwa, tsawaatse ba dazandzaje, adaba kure wá, kwá am erva á Yaakadada. Á higa jipu ervaunde-aaruwa áte kure, yá kátá ba ya pute ice-aaruwa áte kure, adaba kure wá, ngahire-aaruwa ya shanaa á ba áte kure.

<sup>2</sup> Ekkure tara Aiwaudiya antara Sintike keni, yá ñalakurnjala taslawá á kure melaumela. Adaba bukerdïre á kure kwa ba emnde á Yaakadada. <sup>3</sup> Daaci yá bakanba ge ekka keni sleslera palle antara iya: Melaterumele ge ñwasha na, adaba wawanjeruwawa jipu antara itare ge balateraa labare á higa, elva a Yaisu \*Almasiihu ge emnde. Iya, ñwasha ñanna, Kelementus, antara emnde a Yaakadada umele na ankwá zhera-aatare am wakita á Dadaamiya na keni, bademmire á ñere ndza ña magaa slera átirpalle.

<sup>4</sup> Higauhiga ba kelaazare, adaba gakurevge am erva á Yaakadada. Yá ndahakurndaha zlabé adaliye: Higauhiga. <sup>5</sup> Magaumága názena tá de diyeddiye emnde átekwa geni kwa emnde a farvaunđe. Yehauteyeha geni Yaakadada á eptsa ba herzhe na. <sup>6</sup> Dzamauka ire dekideki, bawanánba názena ektsakuraarektse bademme ge Dadaamiya, ñalaunála ba ñane palle geni á melakurumele, antara slafa we á kure ge ñane campaukkwe. <sup>7</sup> Daaci Dadaamiya á de vakurteva hairire-aara na jauje ge diya emnde bademme na, á de tsufakurná ba hairire ñanna ervaunđe á kure antara enkale á kure, adaba kwá am erva á Yaisu Almasiihu.

### *Dzamaudzama duksa-aha na*

<sup>8</sup> Egdzar mama-aha-aaruwa, náwa una halavuwa á elva-aaruwa. Bademme á názena gevge shagera, antara názena á wayaná Dadaamiya, viyawanaaka. Dzamaudzama názena gevge jirire, názena hyafhye geni emnde tá fa zherwe áte ñane, názena áte

unḡule-aara, názena gevge cudedfde, názena an dárádza, názena á de maga námpire, bademme. <sup>9</sup> Bademme á názena kwa tsahesaa kure ázeruwa kwa lyevaahé na, antara názena kwa cenanaa am mbuwe-aaruwa, názena ya maganaa ya zharakurnaazhara na, magaumága áte unḡule-aara. Daaci Dadaamiya slevamite hairire na á de tsufakurtsufa.

*Paul á slafater we ge Filipi-aha adaba sadake á nasherire-aatare*

<sup>10</sup> Yá slafaná we-aaruwa jipu ge Yaakadada Yaisu \*Almasiihu, antara higa-aaruwa cam-paukkwe, adaba zlabé danseka am ire á kure. Á ba am zunḡwire keni, ba jirire kwa dzamidzama, amá shakuranka ba barama á velita duksa, haa harahare estuwa. <sup>11</sup> Banakuranka una adaba yá am baakire, mbansembe njá an higa ma aḡkwa duksa-aaruwa, ma baaka duksa-aaruwa keni. <sup>12</sup> Diyandiya nja ma yá am baakire, ma yá berba keni. Diyandiya nja ma yá estara keni, ma aḡkwa duksa ge zuze-aaruwa, ma baaka ba názena yá zuze keni, ma yá berba, ma ektsiyarektse náza ja wedera-aaruwa keni. <sup>13</sup> Yá dzegwándzegwa mága una-aha ḡanna bademme adaba barka á Yaisu Almasiihu ḡane slevita ndzedá. <sup>14</sup> Aley keni, kwa magaa ba shagera ge una ni kwá aḡkwa meliyumele am laruwa-aaruwa na.

<sup>15</sup> Ekkure emnde a Filipi wá, diyakurdiya ba kure keni geni kwaye á ba am sarte na ya fantuwanfe ge balakura elva á Yaisu \*Almasiihu am Makiduniya na keni, ya zlalehe ba estuwa am larde á kure, sey ba kure palle una kwa

meliyumele, ba kure palle una kwa vitaa duksa. <sup>16</sup> Am sarte na ya am Taisalauniki keni, ndza kwa velitaa ba kure duksa ser buwa ge ja wedera-aaruwa. <sup>17</sup> Yá ndahakur una geni yá kátá duksa-ka, amá yá higa adaba diyandiya geni Dadaamiya á de ga barka áte kure adaba sadake á nasherire á kure. <sup>18</sup> Lyanvalya názena kwa velitaa kure na bademme am erva á Aipafraditus, hyafhye jipu, jauje am názena ndza ya katanaa ya. Duksa-aha nanna shagera jipu ge sadake á nasherire á katafke á Dadaamiya, ervaunđe á Dadaamiya emtake jipu. <sup>19</sup> Dadaamiya na bademme á kwakyire á duksa á ba azenara na, á de hyakuranvehye wedera-aha á kure bademme an zhera á Yaisu Almasiihu. <sup>20</sup> Demdemire ge Eddemiya Dadaamiya dem ba ge dekideki. \*Aamin.

*Use á tara Paul an emnde umele*

<sup>21</sup> Gawaterga use-aaruwa ge emnde a fetarfe na tá am erva á Yaisu \*Almasiihu bademme. Egdzar mama-aha á miya na tá antara iya áhuna keni tá anƙwa gakur use-aatare. <sup>22</sup> Bademme á emnde a fetarfe tá anƙwa gakur use-aatare, kwakya-aara ba emnde na tá á mba á male á larde á Rauma. <sup>23</sup> Yaakadada á miya Yaisu Almasiihu á gakurarga barka ge kure bademme.

**Wakita á Dadaamiya**  
**La Bible en wandala**

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 21 Feb 2024 from source  
files dated 29 Jan 2022

dec75dd5-4784-5059-aa00-668d508a6b0d